



শ্রী সুভাষ চন্দ্র সিংহর

কবিতা



বিষ্ণুপ্রিয়া মণিপুরী সাহিত্য সভা

পাঁচডালি • আনিপুর • সিংলা



সূচী পত্র

	পৃঃ
১। আহৌ	৫
২। চর্চানী	৫
৩। উঠ উঠ	৬
৪। মি পাগালা	৬
৫। হজাকর এলা	৬
৬। আমার অজা	৭
৭। ইমার উহানাত বয়া	৮
৮। বন্দা বুড়ী	৮
৯। ইমা ভারত	৯
১০। বিষুর দিনে	১০
১১। সুদেষণ	১১
১২। শ্রদ্ধাঞ্জলি	১১
১৩। ভ্রমর	১২
১৪। ডর নেই	১৩
১৫। নিংশিং	১৩
১৬। নিঙ কবি	১৪
১৭। পাহরানি নারতৌ	১৫
১৮। মহেন্দ্র	১৬
১৯। লৌলাম	১৬
২০। গীতিস্বামী	১৭
২১। আনুরার ছড়া	১৭
২২। ফাল্গুন	১৮
২৩। মেঙসেল	১৮
২৪। তক্‌পা কাম্পা	১৯
২৫। খুন্ডল	২০
২৬। ত্রিগুণী	২১
২৭। শ্রীশ্রী রাধামাধব	২২
২৮। কারকা যে আহেছ	২২
২৯। কারকা কাদৌরী	২৩
৩০। আকগৌ বাঘ'গ	২৪

পৃঃ

৩১। শ্রদ্ধাঞ্জলি (২)

২৪

৩২। পেটুকগি

২৫

৩৩। মানুরকা মানু

২৫

৩৪। হরণির জুরণ

২৬

৩৫। হে আনুরা

২৭

৩৬। সাধুবাবা

২৮

৩৭। ওহে বিমল

২৮

উৎসর্গ

মোর হনার 'কবিতা-এলা' গ্রন্থগৌ এহান
মোর পরম পূজনীয় পিতৃদেব ° থনি সিংহ বার
পূজনীয়া ইমা ° সাঙ্গুরেই দেবীর নাঙে উৎসর্গ
করলু ।

— সুভাষ চন্দ্র সিংহ

৫ অক্টোবর ২০১২ইং

SUBASH CHANDRA SINGHAR 'KABITA-AELA'

শ্রী সুভাষ চন্দ্র সিংহৰ 'কবিতা এলা' গ্ৰন্থ এহান বিষ্ণুপ্ৰিয়া মণিপুৰী সাহিত্য সভাৰ পক্ষে শ্ৰী কৃষ্ণানন্দ সিংহ গিৰকৱেল প্ৰকাশিত 'কবিতা এলা'ৰ সংকলনহান ।

গ্ৰন্থ স্বত্ব : গ্ৰন্থকাৰ

প্ৰকাশ কাল :

৫ অক্টোবৰ ২০১২ ইং

প্ৰকাশক : শ্ৰী কৃষ্ণানন্দ সিংহ

বিষ্ণুপ্ৰিয়া মণিপুৰী সাহিত্য সভা

পেচায়ালা : আনিপুৰ : সিংলা

কৰিমগঞ্জ (আসাম)

মুদ্ৰণ : শ্ৰীমা প্ৰিন্টিং প্ৰেস

ৰামকৃষ্ণনগৰ

দামহান : ২০.০০

তাজা বিশহান ।

গ্রন্থকারর কথা আকচুটি —

গিরিগিথানী,

আগেতু অনেক হুপন আছিল-লৈরিক আকেইহান
ছাপানি বুলিয়া, কিন্তু আর্থিক সম্ভট, পারিবারিক সাংসারিক
আয়েলার কারণে সম্ভব নাছিল। 'চিত্রাঙ্গদা' 'ফাগু' ও আর
আর মেগাজিনে মোর লেংকরা কবিতা প্রকাশ পাছিল।

বিভিন্ন সময়র লেখা আছিল, যেহানি পেইলু, উতাল
পুল্লাপে 'কবিতা-এলা' গ্রন্থগৌ এহান প্রকাশ করানি অইল।
এহানাত নিয়াম খৌলাক, পাংলাক বারো সিজিল করে
দেনারকা সুহুদ কবি কালাসেনা গিরকরাং মি কৃতজ্ঞ।

অকলেই লেখাল পাঠক গিরিগিথানীরাং এ হুকাং
প্রয়াসর লৈরিক এহান তুলে দেনি অইল। পাঠকর সাহায্য
সহানুভূতি পেইলে আরতাউ প্রকাশর আশা থয়ার।

— গ্রন্থকার

প্রকাশকর দ্বি আকচুটি কথা ----

শ্রী সুভাষ চন্দ্র সিংহ গিরক কনাকতো কবিতা, এলা, নাটক ইকরিয়া আহেরগ । গিরকর কবিতা গৌহাটীত্ব প্রকাশ অসিল ‘চিত্রাঙ্গদা’, ‘হিঙ্গালাত্ব’, ‘ফাগু’ বারো আর আরতা পত্রিকাতে সময়ে সময়ে ফঙছিল ।

গিরকর ইকরা ‘কবিতা-এলা’ গ্রন্থর ‘কারকা-কাদৌরী’ ‘মানুরকা মানু’ এসাদে কবিতা নিয়াম আকর্ষণীয় । সমাজে একতার ভাব, মিচাং মান্নার ভাব প্রকাশ পাছে । এসাদে বিভিন্ন কবিতা এলাত সমাজর কলা-কৃষ্টি, প্রকৃতি প্রেম, , গুরুভক্তি, আন্দোলনকারী মনোভাব ফঙছে । উতা পাকরিল মাহি খৌরাং থার । ‘বনপুরার জ্বালা’ নাটক মঞ্চস্থ করানি অছিল । গাং লয়াত নিয়াস সমাদৃত অছিল ।

গিরিগিথানীয়ে ‘কবিতা-এলা’ গ্রন্থগৌ এহান পাকরেদিলে গিরকর খৌরাং বারো হন্না সফল অইতৈ, লগে সমাজর সাহিত্য ভাণ্ডারগ’ত কহন আগ চৌনা পাংকরিয়া চাংখল করক বুলিয়া হেইচা করুরী ।

---- প্রকাশক

শ্রী কৃষ্ণগনন্দ সিংহ

আহৌ

মোরে না করিয়ো ----- য়ারৌ
মোরে বাদ দিয়া
লেহা নুয়ারতাই---- আহৌ ।
চুমলাল না বিসারিয়ো
তানু আমার শৌ,
স্বর্গতৌ কম নাছিকো
লিচেং শক্তি দৌ ।
যুগে যুগে পাছি নাইকো
মহাভারতর দৌ;
রামায়ণেত্ব কম পাছিতাং
এতা হাবি পৌ ।
মোরে না করিয়ো --- য়ারৌ
লেহা নারতাই
মোরে বাদ দিয়া ---- আহৌ ।

চচ্চনী

মানুরে মানুরে না চচ্চিয়--
মানুরে মানুরে নিন্দা না করিয়,
মানুরে চচ্চিলে অর ক্ষতি
জনমে উগরতা নার উন্নতি ।
নিজের দোষ চাপেইতে
মানুরে চচ্চিয়ার
মানুর হবা দেখলে
কতি হীনপোয়ার
বাহিরে হবা, ভিতরে জ্বালা
মানুর হবায় জ্বলিয়ার -
বাহিরর হবা দেহেয়া ।
নিজের দোষ নিজে হারপেয়ার
আঁহিথম জিপেইলেই বৌ পড়িয়ার ।
দোষ স্বীকারে মহান অইতারা ।
কিয়া ? অহং জি-এ দেব যাতনা ।

উঠ উঠ

উঠ উঠ ছাত্র যুবক
উঠ উঠ ছাত্রী যুবতী,
তুমিই দেশের মেরুদণ্ড
তুমিই সমাজের প্রাণ ।
দেশে দেশে দুর্নীতি,
গাঙে সমাজে মারামারি,
দূরেই কর — কৌলি গালি
শাস্তি আন, শাস্তি আন,
আন শাস্তি, আন শাস্তি
কর, গাঙ দেশের উন্নতি,
তোমাং আছে - হাবি শক্তি ।
তুমিই দেশের মেরুদণ্ড
তুমিই সমাজের প্রাণ ।

হজাকর এলা

হজাক অইনে -- আজি বিষুপ্ৰিয়া ।
না থায় আর ঘরে বয়া ॥
বিশ্বর মানু, হাগে ফরদিলা ।
থাইলাং আমি কৌজিয়া অয়া ॥
ঘরর কৌলি মৌতুপ করিয়া ।
নাইলাং আকতা আজি পেয়া ॥
ডেই ডেই হারা অবার ভাগনে ।
নেই শাস্তি -- আমার কপালে ॥
হনার মণিপুর মাটি বেলেয়া ।
আইলাং আমি আসাম ত্রিপুরা ॥
বীর বলুবাহনর বংশ অয়া ।
থাইতাঙাই কিয়া ঘুমজিয়া ॥

মি পাগালা

হায় ! মি পাগালা,
হায়হান মাতলে
মাস্তরা পাগালা -
চুমনেই মাতলে --
মোরে তাল করতারা ,
সেতহান মাতলে --
অট্ বেকা করতারা --
হায় ! মি পাগালা ।

হায় ! মি পাগালা
ভাবিয়া কিতা করতু
মি আকখুলা,
আক্গৌ নেই
মোরে পাংকরেকুরা
হায় ! মি পাগালা ।
হাবির চিন্তা খাল করিয়া
বাহে বাহে যাউরিগা
লাক নাপেয়া পার না পেয়া
গুলাহানর সাদনে
যাউরিগা বাহিয়া
না পেয়া কুল কিনারা
হায় ! মি পাগালা ।

আমার অজা

আমার অজা

গোপী এইগা,

লদে আজি

আমার হমা ।

হাবির অজা --- এইগা,

অকলক্ করে

উজার করে

দান দিলে --- শিক্ষা ॥

মানুর হকে

পাল করলে

গাঙ দেশর

শৌরে

জ্ঞান ভাণ্ডার সিতারেয়া

কত শত শিষ্য প্রশিষ্য

আধারেত্ব পহরে

আনেদিলে --- মিমাঙে ।

উতার গজে

লেইরাপার মুক্তিত্

সমাজর্ চিন্তাত্

জনম হানৌ সঁপলে ।

আমার এইগা

হাবির এইগা

লদে আজি

হাবির হমা ॥

ইমার উরহানাত বয়া

ইমার উরহানাত বয়া
উরকে আহিয়া
হিকেছু ঠারহান
ইমা বিষ্ণুপ্রিয়া ।

চন্দ্র-সূর্য্য -
মিমুত অয়লেউ
না পাছরতৌ - এ
ইমা ঠারহান ।
শ্মশানে যিতৌগা যে দিন,
ছালি'গ অয়া-মিশ্তৌ
ইমার চরণে উদিন ॥

বৃন্দা বুড়ী

কতি হবা বৃন্দা বুড়ী
শৌরে বাহনা পেইরী
শৌ এ খেইলে হারৌ অইরী
নাচে - নাচে আটিরী ।

বৃন্দা বুড়ী এ বেছিরী
লারৌ কাপক মুড়ি
সিকি মাছেই নাচিনিরী
ডিবাই - ডিবাই দিরী ॥

‘খেই খেই’ বুলিরী
নিয়াম নিয়াম দিরী
নাচে নাচে এলাদিরী
মি আছু - পাঁচডালী ॥

লাভ লোকসান হার না পেইরী
আমার গাঙর বৃন্দা বুড়ী ॥

‘ইমা ভারত’

(দেশাত্মবোধক)

ভারত ইমার

লিশিং লিশিং

আছি জিপুত

বীর পুরুষ ।

ইমার নাঙে -- বিশ্বত আজি

ফিরাল তুলতাঙাই

ফিরাল ফর্দুয়েইতাঙাই ।

হিন্দু, মুসলিম,

বৌদ্ধ, খৃষ্টান,

ইমার উরুকে

আছি তিলয়া,

নানা জ তর

নানা ভাষা

হাবিয়ে তিলয়া

আছি কতি --- আকতায় ।

বজ্র পরক

বোমা ফটক

আলনাইতাঙাই

আজি আণ্ডুয়েইতাঙাই

ইমার নাঙে

বিশ্বত আজি

ফিরাল তুলতাঙাই

ফিরাল ফর্দুয়েইতাঙাই ।

বিষুর দিনে

গৈ'গ অছি,— কনাক বুজন

আহিল বুলিয়া বিষুর দিন ।

নামসা ফুল, পিদিয়া কানে

নুয়া ফিজেৎ পিদতারা —

বেয়াপা - বুজন ।

হরিণাম'ল বিভূলা অইতারা

বিষুর পাঁচ-‘অ’ দিন,

মন্দিরে মন্দিরে আরতি দিতারা

লামর দৌরে — দিয়া বার্তন ।

মেঠেল মেঠেল রাধতারা —

দৌরে লেইরুক দেনারকা

চুঙে পানি , লাতলে লেইরুক

পিঞ্জুরার পথে দিতারা ।

ঘরর মানু, - লগে শৌ —

হাবিয়ে হমা দিতারা ;

কাদা বাবার লেইকি ঘরে

হৌর মেঠেল বিলাবিলি দিতারা ।

পিঠা পুরী বাজতারা

গিল্লা - নিকল খেলানিরকা,

কনাক শৌ-এ-হারৌমনে

সেঙ্কম চরকর তারা — ক্ষীর খানারকা ।

মৌনাহা পুরজিলেই - কনাক বুজন বেয়াপা

লৌদিতারা হারৌ এ —

দশ পচিশ বুলিয়া ।

সুদেষণ

ইমা মান্না সুদেষণ —

তি আমার ইমা,

লদে আমার হমা ।

জরম অয়া — এ জাতে

ধন্য করলে আমারে ।

ভাল করলে পালকরলে হাবিরে

ইতিহাস রচেইলে ।

ষোল্ল ই মার্চ - ছিয়ানব্বই

অইলে চির অমর — তি,

পরেইলে তি - মণিপুরী

বিষ্ণুপ্রিয়া মণিপুরী

ইচুদিনর দাবী ।

● এ কবিতা এলার সুরে দেনা য়াকরের ।

শ্রদ্ধাঞ্জলি

(আজি এ) পুণ্য লগ্নে — এ পুণ্য দিনে

লৌদেই হাবি এক অয়া ।

এ স্মৃতির দিনে ওয়াশাক করিক

কল্লিং হাবি কক্করিয়া ।

সাহিত্যর নেই জাতি ধর্ম

নেই কোন বিভেদ —

মহা মিলনর মহামন্ত্রত

অইক হাবি দীক্ষিত ।

পুলদেছি সমাজসেবী

আহেদেছি কত অতিথি

লদিক ভক্তি —

এ শ্রদ্ধাঞ্জলি ॥

● এলার সুরে দেনা য়াকরের ।

ভ্রমর

হে ভ্রমর !

যারগা কিয়া --

মোর হৃদিত,

দিয়া জ্বালা ।

ফুলর বনে -

সাতছে যে ফুল

হারৌ এ ভ্রমর

আহিতারা বিভোর

যারগা তিতে --

মোরে পাথুরিয়া

মোর হৃদিত

দিয়া জ্বালা ॥

যাগা ভ্রমর

যাগা, যাগা,

তোর বিরহে

থাইতৌ মি

তোরে নিংশিং -- অয়া ।

তোর নিংশিং

ঘাটর পানিত্

থাইতৌ - মি

নিক্কা হাতুরিয়া ॥

* এলার সুরে দেনি য্যাকরের ।

ডর নেই

ডর নেহ, ডর নেই,
ডর নেই, ইমা,
আন্দোলনে ডর নেই ।
আন্দোলনে আকতা অইলাং --
তোর জিপুত হাবি ।
আন্দোলনে আকতা অইলাং
বিশ্বত আমার -- কিতা নেইথাং ?
ক্ষত্রিয়র তেজ আছে -- আমারাং ।
উঠ আহ, ছাত্র হাবি,
দেহয়েই তোমার পাঙ্কাল বলি ।
কৌলি গালি, -- পাটা-পাটা
দূরেই কর দলাদলি,
এ সমাজে এ মালেমে
দেহয়েই অনি আকতা ॥

নিংশিং

হে এইগা -- মদনমোহন
সাহিত্যে রসিক রতন,
লদে হমা থয়া বাহ্না
কৃপা দৃষ্টি করে দিয়া ।
অমর কবি, -- তি দরদী
পথ প্রদর্শক আমারাং ।
তোর নুংশিপা সুরর --
এলা দিয়া
সমাজ আজি
সংস্কার অকা
সমাজ হাবি
হজাক অকা, আকতা অকা
লেংকরা তোর কাব্য যেতা
উতা পাকরিয়া ।

নিঙ কবি

হে অমর কবি !

তোর কবিতার পারেঙল

হাজাসত সাহিত্য ভুবন ।

ভাগ্যলক্ষ্মী কত ইমার উর

করলে রসাপ্লুত , সাধনার ধনল,

রত্ন ভাণ্ডার করিয়া উজার

হাবি তন-মন-ধন ।

ওয়ার্ডস ওয়ার্থ, শেলী, কীটস্

ইংরাজী সাহিত্যের রথী

রচাছি কতি । তেবো তোর

সাহিত্য বসেত্ব (নাটকাদি কাব্যগ্রন্থত্ব)

তানুর ভাব রস পেয়ার ।

মাইকেল, নজরুল

সাহিত্য সৃষ্ট ভাবের আঁধার

বিচারে পেয়ার চানাপা আকতা

অকরাত্ব খামতল ।

হিমালয়'র সুরুঙে-ঝুরুঙে

হিলর লুম্পাকেদে আহের ঝরনা

অয়া দিশাহারা ! যে খৌরাংল —

মিলন সাগর সঙ্গমে ।

রোমান্টিক লিরিকেল রেনেসার সুরল

পুরাদিতে উসাদে — তোর অপূরণ

সাধনার সাহিত্য ভাণ্ডারে ।

কবি মদন এইগার নিঙে তাঁর ৪র্থ মৃত্যু বার্ষিকী অনুষ্ঠানে
পাকরানি অছিল ।

পাছরানি নারতৌ

সুহৃদ বর !

তোরাং মোহমস্ত্র

লুকেয়া থছত পাউরী,

যেপেইত হেপেইত বিপদে আপদে

তোরে নিংশিং অউরি ।

পাছরিং পাছরিং বুলতে

পাছরে নুরারুবি ।

ঘাটে ঘাটে

হৈপদ এতা

লমনার তেবো

দুঃখর বুজা এতা ।

পাছরিং বুলিয়া

জিনা আছিল যেতা,

খমকরিয়া হাবিতা —

ফৌ- অইলুহা, —

বৈতরনীর পারে ।

তেবো, তোর তেৎনেই

খৌরাং'র ডাক ---

কিয়া হ্নুরিতা !

আজি পেয়া ।

থয়া ইশা মরতৌ যেবাকা

তোর নিংশিংল কাঁদিয়া থাইতৌ

নাদতৌ দুঃখ পানা

রিদিত থয়া --

তোরেল ফর্দিতৌ ।

কোনদিন তোরে মি

পাছরে নারতৌ ।

কোনদিন তোরে মি

পাছরে নারতৌ ।

* কবি কালাসেনা গিরকর নিঙে ইকরানি অছেহান ।

(১৫)

মহেন্দ্র

ধন্য ধন্য মহেন্দ্র

ঐতিহাসিক মহেন্দ্র

তোর লেংকরা ইতিহাস'ল

পরেইলে আর্থত্ব ।

য়েকনাপাই — মিমুত করলা,

আমার ইতিহাস,

তোর লেখনীল আজি

উদ্ধার করলে ওতা ।

(আমার) আপা বপা'র ভিটা,

লকতাকর পারে, —

লেইসাং লেহফাম রাজধানী

আছিল বিষ্ণুপুরে ।

আজির বিষ্ণুপ্রিয়া ——— আদি বাসিন্দা

ছনার মণিপুরে ।

* এলার সুরে দেনি য্যাকরের ।

লৌলাম

ইমা-ইমা লদে হমা

কাৎকরিয়ার পুনিঙ্

দূরেইত্ব দিয়ার হমা ।

ইমার লৌলাম বাহনা

হারপেইয়া তেবো

এপেইত্ব দিয়া হমা ।

চেয়া চেয়া বাছা ছিলাং

ইমার মিল্লেঙ আকচুটি

কোন শাপে বঞ্চিত্ অইলাং

অবুঝ শৌ আমি ।

কর্মদোষে ইমার গর্ভে

দেছিলাং জ্বালা কতি

ভাগ্য দোষে না পেইলাং ইমার

বাহনা-নুংশি আজি

গীতিস্বামী

হে কবি গীতিস্বামী
প্রণতি থাইল
তোর চরণে ।

ইমা-ঠার ছাড়া
কোন সমাজ না-বাঁচতারা
পাল নাইতারা
এ অমর বাণী
বিলেইলে তি
সমাজর কোনে কাঞ্চলে
তি গীতিস্বামী ।
হে জাগরণর করাগ
তি গকুলানন্দ
দিয়রতা কতি আনন্দ,
আজি তোর জরমর খেলে
স্মৃতি সভা পালন অর
অমর তি চির অমর
তি গীতিস্বামী ।

* এলার সুরে দেনি য়াকরের ।

আনুরার ছড়া

পাঁচডালি (আমার) গাঙর মোহন জ্যেঠা
মাছ ধরানিত হেইনা
লগে বিন্দু জ্যেঠা
মাছ শিকারে বুড়া ।

বরণরকা হাগহান চেয়া
আটতে ফিরতে থাইতারা
আনুরাহান পানিয়ে বুঝলে
হারৌ এ হৃদি ফুকারতারা ॥
পারণ হুপা বুনারিরকা
দিতারা কতি শ্বিংনা
বিয়ান ফুওয়ালি বাছানুয়ারিয়া
হাঙ্কেল ইঞ্চিল'ল দাপদিতারা ।
কুঙ্গই আগে পাতবাংতা বুলিয়া
দাপদিতারা হুপা-হুপি করিয়া,
ফামকালকরানিত যিতারগা
আগরে আগৈ না বাছেয়া ॥
আনুরার পানী কনাক বুজনর য়ারী
হারৌ ফুর্তি খলেই খলেই মাছ ধরানি,
আহবা নেই এবাকাতে
অকরলা চানাপা পাহরানি ।

ফাল্গুন

ফাল্গুন আহিল —

লিরি লিরি মলয় বৌ-এ
হৃদি অর কঙালা ।

হে ফাল্গুন আশার ফাল্গুন

মিমাঙে-তি কতি পালছত
তোর খৌরাং, বাটিয়া জীবরাং
নুয়া জিনা পালকরর ।

হারৌর ফাল্গুন ওক্করতৌ বুলিয়া

বাছেয়া আছু মি —
প্রেমর বর্তি লাগেয়া —
লমইতেগা, যারগা ফাল্গুন
প্রেমর বর্তি নিভেয়া —
পঞ্চরিদি উড়া দিয়া ।

হে ফাল্গুন !

যানার সময়ত থয়া যিস্গা
প্রেম রসে বুজেয়া ।

* এলার সুরে দেনি য্যাকরের ।

‘মেঙসেল’

মেঙসেলে দেহিয়ার
নিজর ছবিহান,
হাবিরে চোর ভাবের
চরগই নিজর মনহান ।

ঘাত প্রতিঘাত, দুঃখ দুর্দশা
পানা উহান স্বাভাবিকহান,
হিংসা নিন্দা ক্ষতি করানি
মানুরতা অইল চরিত্রহান,
মানুরে না চর্চিলে ———

উগরতা না লাগের ঘুমহান ।
অতীতর কর্মল বিচার অরতা
লেপর তা তার ভবিষ্যৎহান ।

তক্‌পা-কাম্‌পা'

পৌরেই আহান --- কনাকেত্ব হুনেছিহান

মালক আক'গর পেটগত --

'তক্‌পা' আগই 'কাম্‌পা' আগই

থানি এহান --- চানাপা ঔনাহান ।

'তক্‌পা-কাম্‌পা' --- বেইবুনিহান

কতিয়ৌ অমিল ভাবহান ।

হবা 'কাম্‌পার' ভাবহান

অমাটিক সাকতি তক্‌পার লামচেতহান ।

কাম্‌পার আছে ডাঙর মনহান

দল বেদল তারাং সমান ।

কথা দিলে করের কামহান--

শৈনেই, --- হাবিউ হারপাছিহান ।

তক্‌পা বেয়েয়া নামাবলীহান

মনর ভিতরে কু-কর্মর বকচাহান

মাতের আহান --- করের আহান

না ভারের অয়তৈ ভবিষ্যতে

কি ফলহান ।

'তেবো' ইমারাং হাবি সমান

জাপদিয়া থইরী মায়াহান,

'তক্‌পা - কাম্‌পা' - আচানকহান,

এহান পাউরী মাতৃভাবর বেরা জালহান ।

‘খুন্তল’

হে সমাজসেবী !

কিতাল দিতাং

খুন্তল ভক্তি ।

ইমাঠার উদ্ধাররকা ---

খেইলাই বুকে --- শিবেরই গুল্লি ।

রকত দিলাই --- জাতর সালে

পেইলাই কি থাকাত ? ---

এ সমাজে ।

সড়কে পথে ---- রকতর গোলা

কাঁদলা কতি --- হাবি জাতে ।

হে সমাজসেবী !

মিকুপে আক্তা --- মিকুপে থেই ,

পুতনা মায়া দেহেইলাই কিয়া ?

এ সমাজে ।

হাদিত থাইতই --- তোমার নাংহানি

যুগ যুগ ধরিয়া তোমার য়ারী

‘সমাজ হাবি ----- তোমাং বন্দী

সমাজ আজি ---- তোমাং বন্দী ।

কাতকরিয়ার খুন্তল --- কঙালা ভক্তি

লদেই আজি , ফুল ভক্তি ---

ওহে সমাজসেবী !

কিতাল দিতাং

খুন্তল ভক্তি ।

ত্রিগুণী

হে তিন গুণী

তনু মনি গীতি

(আজি) লদেই হমা স্তুতিভক্তি ।

তনু, জরম অইলে সিলেটে,

ডিগ্রী লইলে হাবির আগে

ছনার মেডেল পেইলে বঙ্গে ।

মনি, — তি মহেন্দ্র

ঐতিহাসিক মহেন্দ্র

সমাজে তি ধন্য ।

মনিপুরী ইতিহাস'ল

আর্য্যত্ব পরেইলে — তি আমারে ।

ভানুগাছর গকুল —

তারান্নাই বুজেছে তোর কুল

আঁহির পানি'ল — আহিলে তি

এ ভারতভূমে ।

জাগরণী এলা দিয়া

জাগেইলে সমাজরে ।

হে তিন গুণী —

ফুল বর্তিল — পুন্নিং মনে

কাৎকরিয়ার শ্রদ্ধাঞ্জলী ।

* এলার সুরে দেনি য়াকরের ।

শ্রীশ্রী রাধামাধব

জয় জয় শ্রীরাধামাধব
জয় জয় শ্রীরাধামাধব
ধন্য আজি ইমা মালেম ।
হাবি ভক্ত তিলয়া
বৃন্দাবন — এ ধাম —
হাজেইলা,
গোপীভাবে ডাকদিতারা
মাধব মাধব বুলিয়া ।
বৃন্দাবন রাসর ধূলিত
গড়াগড়ি দিক্‌নে
ভক্ত হৃদিত

প্রভুয়ে নাচের
রাধে রাধে বুলিয়া
জয় রাধে রাধে বুলিয়া ।

* এলার সুরে দেনি য্যাকরের ।

কারকা যে আছেছু

কারকা যে আছেছু
এ ভবে মি,
কি কাম করৌরী
নিজরে নিজে মি
চিনে নারুরী ।

দেশ - দশরকা
কিতা মি ভাবুরি ,
পরহিত ভাব হৃদিত
কি দিয়া
আনে নুয়ারুরি ।

ভাবনার সংসার'ল মি
ডুবিয়া থাউরী
জনসেবায় ভগবদসেবা—
(আজি) কিতা অয়া
মি পাছরৌরি ॥

কারকা কাদৌরী

কারকা কাঁদৌরী
কারকা মি মাতৌরী
আকতা অইকনে আজি —
আমার মানু ।

বিশ্বর মানু
মঙ্গল গ্রহে উঠলা,
বিছারতারা তানু
সূর্য, গ্রহ, তারা ।
দেশে দেশে আজি
রকেটর শ্বিংনা
কারে কুঙ্গই জিঙে খেলতাম —
চেয়া চেয়া ।

আসাম ত্রিপুরা
বাংলাদেশ হৌপারে
হাগে মাটি-এ পারা
আছি লামলাকে ;
আগরে আগই চিনাচিনি নায়া
আগর দুঃখত আগই —
কাঁদানি নুয়ারিয়া
আঁহির পানি'ল বুকগ বুজেয়া
পেয়া আছি — কতি তাপিত ।
বেলেই-বেলেই — বার্তন থিং কৌলি
হাবি কৌলি,
লেইফাম - লেইসাং, দাপা শিংলুপ
বার্তন থিং কৌলি'ল —
না থায় মজিয়া ।

* এলার সুরে দেনি য্যাকরের ।

আক্গৌ বাঘ'গ

ঘর, সমাজে

আক্গৌ বাঘ'গ ।

ইমার সেবা

সুপকো না করিয়া

কানা নাইবো

জিপুত পেয়া ।

আহৌ আট'গ ।

স্বামীজী নেতাজী ঠৌনা

অনা সমাজর শৌ-সুমারা

আক্খুলাগর লগে

কোনোদিন সমান নাইবো

গুণহীন জিপুত — আহৌ আটগ ।

ঘর, সমাজে —

আক্গৌ বাঘ'প ।

শ্রদ্ধাঞ্জলী (২)

আজি পুণ্য দিনে

পুণ্য লগ্নে

হমাল আজি

দিয়ার শ্রদ্ধাঞ্জলী ।

তিলইলাং আজি

ছাত্র-হাবি

তিলইলাং আজি

ছাত্র-শিষ্য হাবি ।

আজি —————

গাঙ দেশর সমাজসেবী

পুন্নিং মনে আজি

হাবি তিলছি

শ্রদ্ধা ভক্তিল আজি

দিয়ার শ্রদ্ধাঞ্জলী ।

‘পেটুকগি’

গাঙর পেটুকগি-

দলাই-বলাই-

শৌ এগি ।

নুয়া গাঙর পেটুকগি,

গাঙে ঘরে--

চিনেছি ।

হাবিউ হারপাছি

গাঙর পেটুকগি ।

পারচ পাত-তেতু

দিতারা ঠেলাঠেলি

নাং-নারকো-টালা এইগাই

বলাই দেনি ।

কুঙ্গই আগে বহানি তি-না-মি,

দিতারা ঠেলাঠেলি

গাঙর শৌগি ।

আজি খেচুরীর পালি--

বলাইর আগে--

খেইলে খেচুরী --

খেইতারাই বাকুরী ॥

মানুরকা মানু

মানুরকা মানু,

জীবরাং প্রেম

বাহনা দেইলে ।

সেতা-ন্যায়--

উহানে ধর্ম

ত্যাগে সুখ

গীতাই মাতের

মানুরকা মানু ।

জগতর মানু

হাবি সমান

কর্মল অইতার

ডাঙর হরকাং ।

নিজরে ডাঙর --

মনে ভাবলে

নাইতার ডাঙর

তানু, - মানু ।

মানুরকা মানু ॥

হরণির জুরণ

মি হরণি জনম দুঃখিনী — মোরে লহে পালছি
এ মালেমর মনুষ্য গিরিগিথানী ।
মোর দুঃখ কারাং মাতানি, বিছারেয়া না পাউরী
হিংসা নিন্দায় বুজেছি, মুখোশধারী সমাজসেবী ॥
জন্ম ধাত্রী ইমা পৃথিবী, ইমা সীতার কেশোৎপত্তি
অকালে হুকেয়া, বাঁধিয়া মোরে, হরতারা, দিয়া শাস্তি ।
তেবো পেলৌরি, মনে থয়া ভক্ত ধূলি
কি নির্দয় অত্যাচার, পাউরি মি হরণি ॥
মোরে দেখলে অমঙ্গল, কুশল, অইতারা অখ্যাতি
মাতে মাতে তেবো অইতারা গুজ্বি, দিতারা দুর্গতি ।
বিপদে মরণ সময়ে, ভূত, প্রেত ভয়ে মাত্তারা-অমঙ্গল তি
বিপদ মুক্তে, অইতারা - পাষান, হয় ! এ মনুষ্য জাতি ॥
নুয়া কইন্যা বরণে, সংসার সাজনে, করতারা সাক্ষী
উপেইত নিংশিং গৃহলক্ষ্মী, কিঞ্চিৎ সময়ে, — মোরে হরণি
মৃতগ নেনা, নুঙেইপা ধামে, মনশিক্ষা লমনি
নিংশিং অইতারা, লাঙ্গল-খাগারা, শকয়া উঠান সেংকরানি ।
কি অদ্ভুত, কি অবিচার, এ মনুষ্যর কীর্তি
লেইলেকে সকইলে আতলপীরে তিঙেইতারা ফুতি ফালি ।
নিজর বিচার নাকরতারা, নিজর দোষ লুকেয়া থনি,
মানুর মন্দ ফুকারা-ফুকারা লেহেইতারা অপরর দোষ ক্রটি ॥
মোর ইমার ধন'ল মারনাস্ত্র হংকরানি,
মেইকখু'গ অইতারা মানু মারিয়া, রকতল ফাগু খেলানি ।
মুচি-মেথর দৌর ঘর পেয়া, মোরে য্যাকরানি ।
মি (হরণি) নায়া মাত, কারেল গুজ্বি করানি ॥
লেইরাপাস্ত নুঙেইপা, চাকরেত্ব মন্ত্রী -
হাবিরাং সমান, হাবির ঘরে থাউরি ।
তোমাং জাত, মোরাং নেই জাত-পাত-পালয়া আছু মি
মি হরণি, ইমা নীঙলপী, গুজ্বির অধিকারিনী ॥
মি সেবারী, মি পূজারী, পালছুতা মোরেল মি
মি হরণি জনম দুঃখিনী হাবিরাং আছু মি ।
ইমার মাছখানি ইমার মাছ'ল হঙনি যন্ত্রপাতি
ঔতালো রকতর গুলা বাহুয়েইয়া যশকামানি, তুমি বিজ্ঞানী ॥

নিঙল শৌরে খেইপকে থয়া, কররাই দূর দূরবালী
কম দোষী নাগৈ, এলা-কাব্য ইকরিয়া, তুমি বুদ্ধিজীবি ।
মোর কাঁদন নেই শেষ, আছে তেবো দিন রাতি
মি হরনি, অনুভূতিহীন, ভেদাভেদহীন, শূন্য হৃদি ॥

হে আনুৰা

হে আনুৰা, —

আহবা কম যিতারাগা
তোরে নিংশিং অকুরা ।
তেবো তোৰ স্মৃতি, তোৰ চিহ্ন
ইতিহাসৰ পাতাত থা যিতৈগা ।

নক-খানি লোভে বন্ধ করলা
যে পথগ'ল তি দাপদিলে—
হাবৌ অয়া খেললে
কত শত প্রজাতি মাছ
শৌ জিপুতরেল ।
হে আনুৰা ! আকুপী ইমা,
লিরি লিরি দাপদিলে
বরিষা আহিলে — হারৌ অইলে
কতি হবা সাজনে —

কঙালা অয়া সাজলে,
হারৌ অয়া হাতুরলে—
পাঁচডালী লপুকর হম্বুকেদে—
রেলর ডাঙর পুলগর
ডাঙর লু পহরীগ পেয়া ।
হায় ! আনুৰা,
ঔদিনকার তোৰ স্মৃতি যেতা
নাও পাছরেছি, নাও পাছরতাই ।
ৰুয়াৰ হাদিয়েদে হাবি মানু ক্ষেতিয়ালাই
এবাকা পেয়া তোৰ নিঙে থদিতারা
টাঙেইসেংকরিয়া — পথ আগো ॥

সাধুবাবা

জয় সাধু ভুবনেশ্বর
আমারাং তি ঈশ্বর
বারোপোয়া জরম অয়া
ঙালকরলে সমাজরে ।

শ্রী রাধারাণীর কৃপা পেইলে
হরিনামর গুণে,
পাপী তাপী উদ্ধার করলে
এলাম -- মালেমে ॥

শ্রীগোবিন্দ চূড়ামণি
করিয়া তি লিং খাতে
ঙাল করলে পাল করলে
নবদ্বীপে আমারে ।

যুগে যুগে জরম অয়া
কৃপা করিস আমারে
অন্তিমকালে থ'দিস ---
শ্রীগোবিন্দ চরণে ॥

ওহে বিমল

ওহে বিমল, সমাজ সেবী
অকালে দ্যৌ - অয়া তি
কাদুয়ার আজি
সমাজ হাবি ।

হে বিমল, আকখুলাগ
মিচাং মান্নার পূজারীগ
দু'গ ছু' - অয়া - নেই সমাজে
নেই সমাজে আরাক্ আগ --
মহামেল '৯৪ থাই তই সাক্ষী ।

পুলকরিয়া জাতর হাবি সংস্থা
ডাকুলা ইসালপা দোয়ার
করিয়া মিছিল -- দেখয়েইলে
দেখয়েইলে তি -- একতা - আক্তা ।

জাতর সালে লৌদে লৌদে
ঠারর সালে কাঁদে কাঁদে
লিশিং লিশিং - মানু, পুলছিলা --
পুলছিলা --- হারৌ মনে ॥

তোর সময়র ঔ মহামেল
দেখতাঙাই আর কোন জনমে
৩১শে মার্চ অমর অক --
তোর গুণর নাম বিলেয়া ॥

লেখকর লেংকরা নাটক —

● বন পুরার জ্বালা

আন্দেলনর গজে ইকরা লেরিক —

● ৫০১ বারো এবাকার য়্যারী

ফঙনিত সালছে —

● ইমা 'পাঁচডালি' গাঙর ইতিহাস